

Iloqarfinni nunaqarfinnilu amerlasuuni aqquserngit aserfallassimaqisut qanoq pitsanngorsarneqarsinnaanerit pillugu apeqquteqaat aallaavigalugu oqallinnissamut siunnersuut.

(Inatsisartunut ilaasortaq Anders Olsen, Siumut)

Akissuteqaat

(Aningaasaqarnermut Aatsitassanullu Naalackersuisoq, Anda Uldum)

Qujanaq kommunini aqquserngit Inatsisartuni oqallisigisassanngortikkakkit. Apeqqutigineqartoq naatsumik akiniaraluassavara. Isumaqarpungali apeqqummut nalinginnaasumik eqqarsaasersuutit tunuliaqutaasut arlallit oqallisigineqartariaqartut. Siullermik namminersorlutik oqartussat aamma kommunit akornanni suleqatigiinneq pillugu oqallinnissaq naleqqulluarpoq. Aappaatullu atorluarsinnaasumik attaveqaasersuuteqarnissap pisariaqarnera apeqqummi saqqummiunneqarpoq.

Apeqqummut naatsumik akissutissaq tassa, aqquserniornerit aserfallatsaaliineqarnerisalu aningaasalersorneqarnissaat kommuninit akisussaaffigineqarmat. Taamatut suliasamik kommuninut nuussinermit atatillugu ataatsimoortumik tapissutit aaqqinneqarput tamatumalu kingorna ingerlaavartumik iluarsineqartarlutik. Siunissaq eqqarsaatigalugu tamanna kommunit akisussaaffigisariaqarpaat taakkumi pilersaarusiornissamut ingerlaavartumillu aserfallatsaaliinissamut najukkami pissusiusut ilisimareermatigit. Kommunit kattussuunnerisigut allaffissorneq aamma kommunini sanaartugassanut missingersuutit ima annertutigilernikuupput allaat suliasamik taassuminnga kivitsisinnaalerlutik.

2016-imut Aningaasanut Inatsisissatut Siunnersuutip suliarineqarnissaanut kommunini sanaartugassatigit kissaatigineqartut piniarsimavakka. Aqqusinernik aserfallatsaaliinissamut kommunit aningaasanik perusullutik qinnunikuunngillat. Taamaattorli mittarfiit umiarsualiviit allatullu attaveqaasersuutitigit annertunerusunik piorsaanissamut kissaatiminnik nasiusaqaarsimapput. Pissusissamisussanngilaq kommunit pisariaqartitsinerminnik oqariartuteqartillugit uagut qitiusumiit akuleruttassagutta. Tamanna kommunalbestyrelsit sulinerinut naleqqutinngitsumik akulerunnerusaaq. Taamaattumik uanga Naalackersuisullu isumaqarpugut, kommunini suliasat namminersorlutik oqartussanit aningaasalersorneqartalisappata tamanna uerisaataaginnassasoq.

Naalackersuisut naalackersuinikkut ataqatigiissaarisoqatigiinni borgmesterinut attaveqarluartarput. Tamatumani sanaartugassatigit pilersaarusiorneq uteqqiattumik oqallisigineqartartut ilagaat. Maannakkut missingersuutitigit suleqatigiinnissamik isumaqatigiissummi aallaavisoq tassaavoq, suliasat oqartussaaffimmi ingerlalluartumik suliarineqarfigisinnaasaminnut inissinneqarnissaat. Ulluni martsip 17-ani aamma 18-ani isumasioqatigiittoqaqqammerpoq, tassani kommunit tamarmik aamma namminersorlutik oqartussat allaffissornermut tungatillugu naapillutik pingaartumik sanaartornermut tunngasut ataqatigiissaarniarlugit aammalu suliasanik naammassinnittarnermut siunissami periusissat oqaloqatigiissutiginiarlugit. Isuma-sioqatigiinnermi Kommunit saqqummiuppaat timmisartoqarfinnut umiarsual-

livinnullu pilersaarutit aqqusineqarnernut pilersaarutinut ataqatigiinnerusumik ingerlasariqartut. Tamanna isumaqarpunga immikkoortortanut pilersaarusiornemi naleqquttuusooq, pilersaarusiornermilu oqaloqatigiinnermi ilaajumaarluni. Isumasioqatigiinnermi angusaasut 2016-imut Aningaasanut Inatsisissatut Siunnersuutip suliarinissaanut ilaatinneqassapput aammalu naalackersuinikkut ataqatigiissaarisooqatigiinni ingerlaavartumik oqaloqatigiinnernut.

Kingulleq oqallinnitsinni tikilaarusutara tassaavoq ataqatigiisumik atorluarsinnaasumillu attaveqaasersuuteqarnissamik pisariaqartitsineq. Tamanna naalackersuisooqatigiit aallukkusutaasa ilagaat, tassa atugassarititaasutigut piumasaqaasiornissaq aningaasaliisinnaasunik namminersortunik qammaasinnaasunik. Tassanilu ilaatigut nunarput tamakkerlugu siunissami mittarfiit umiarsualiviillu qanoq aqqissuussivigineqassanersut isumaqatigiissutigini-assavagut. Kisianni pingaaruteqarpoq, uagut patajaatsunik atugassarititaasutigut piumasaqaatinik pilersitsiniarluta anguniagaqarnitsinni aamma aqqusiniliornerit nunaminertanillu pilersaarusiornarit ataqatigiisillugit eqqarsarnissarput. Tassaniipporlu aamma kommunit inuussutissarsiornikkut aningaasaliisussanut kommuniminnut qanoq pilerisaarisinnaanerminnik eqqarsaasersornissaat. Tassunga atatillugu naalackersuinikkut ataqatigiissaarisooqatigiinni oqaloqatigiilluartarnerit Naalackersuisunit assut iluarisimaarneqarput, anguniagaqarfiusumillu kommunit suleqatigeqarnerisa ingerlaqqinnissaat qilanaaraarput aningaasanut inatsisissamut isumassarsiorfissatut.